

四庫全書

集部

欽定四庫全書

集部

華陽集

目錄
卷上

詳校官太常寺少卿_臣陳桂森

檢討_臣何思鈞覆勘

覆校官中書_臣王慶長

校對官中書_臣孫球

謄錄監生_臣余嘉穎

欽定四庫全書

集部二

華陽集目錄

別集類一 唐

序

傳

卷上

賦

高皇受命造唐賦

并序

茶賦

古詩

上古之什補亡訓傳十三章

上古一章

左車二章

築城二章

持斧一章

十月之郊一章

燕于巢一章

蘇方一章

陵霜之華一章

圉一章

我行自東一章

採蠟一章

五言古詩

在滁苦雨歸桃花崦傷親友畧盡

苦雨

戈陽溪中望仙人城

遊子吟

歸陽蕭寺有丁行者能修無生忍擔水施僧

況歸命稽首作詩

酬信州劉侍郎兄

望初月簡于吏部

上湖至破山贈文周蕭元植

酬本部韋左司

一作奉和同郎中韋使君郡齋雨中宴集

酬房杭州

酬漳州張九使君

從江西至彭蠡入浙西淮南界道中寄齊相

公

寄上兵部韓侍郎奉呈李戶部盧刑部杜三

侍郎

謝王郎中見贈琴鶴

贈別崔十三長官

嚴公釣臺作

長安竇明府後亭

和翰林吳舍人兄弟西齋

華山西岡遊贈隱元叟

初秋蓮塘歸

擬古三首

棄婦詞

從軍行二首

塞上曲

哭從兄萇

傷子

日晚歌

卷中

七言古詩

行路難

悲歌三首

并序

宜城故琴客歌

并序

李湖州孺人彈箏歌

鄭女彈箏歌

劉禪奴彈琵琶歌

感相國韓公

李供奉彈箏篪歌

諒公洞庭孤橘歌

蕭鄆草書歌

杜秀才畫立走水牛歌

苔蘚山歌

同裴觀察東湖望山歌

瑶草春

并序

險竿歌

洛陽行送洛陽韋七明府

黃鵠樓歌送獨孤助

廬山瀑布歌送李顥

露青竹鞭歌

八月五日歌

金鑑玉珮歌

公子行

幽居美

朝上清歌

烏啼曲

邱少府小鼓歌

范山人畫山水歌

嵇山道芬上人畫山水歌

梁司馬畫馬歌

五言律詩

洛陽早春

步虛詞

送友失意南歸

南歸

閑居自述

奉酬劉侍郎

酬唐起居前後見寄二首

奉酬茅山贈賜并簡綦母正字

空梁落燕泥

經徐侍郎墓作

鄜公合祔挽歌

相國晉公挽歌二首

晉公魏國夫人柳氏挽歌

義川公主挽詞

歷陽苦雨

酬揚州白塔寺永上人

送李道士

鄱陽大雲寺一公房

題攝山棲霞寺

經廢寺

蕭寺樞松

白蘋洲送客

送韋秀才赴舉

送使君

春鳥詞送元秀才入京

別江南

傷大理謝少卿

五言排律

樂府

寄江南鶴林寺石氷上人

送從兄使新羅

獨遊青龍寺

七言律詩

宿湖邊山寺

湖南客中春望

閑居懷舊

送大理張卿

五言絕句

春懷

洛陽陌二首

寄淮上柳十三

送李泌

山中夜宿

登樓

江上

溪上

田家

宿山中僧

梅灣

憶鄱陽舊遊

春草謠

六言絕句

歸山作

過山農家

思歸

七言絕句

宿昭應

憶故園

聽角思歸

洞庭秋日

江村亂後

橫山故居

題葉道士山房

山中

王郎中席歌妓

竹枝詞

山僧蘭若

送柳宜城墜

瑯琊寺

贈朱放

短歌行

代佳人贈別

見紀事

宮詞二首

桃花曲

酬柳相公

送李侍郎從宣城取洞庭路往吳興

攝山聽子規

子規

悼稚

海鷗詠

送李秀才入京

悲老宮人

卷下

文類

進高祖受命造唐賦表

如意輪畫銘

并序

大尉晉國公韓滉謚議

文論

陰陽不測之謂神論

戴氏廣異記序

禮部員外郎陶氏集序

信州刺史府君集序

右拾遺吳郡朱君集序

監察御史儲公集序

送朱拾遺序

陪江西李大夫東湖賦詩送宣武軍趙判官

還使序

送韋處士適東陽序

送張鳴謙適越序

江西觀察宴度支張侍御南林花亭序

宴韋庶子宅序

宋州刺史廳壁記

嘉興監記

湖州刺史廳壁記

王氏廣陵散記

華亭縣令延陵包公壁記

宛陵公署記

蘇州乾元寺碑

廣陵白沙大雲寺碑

衢州開元觀碑

虎邱西寺經藏碑

檢校尚書左僕射同中書門下平章事上柱

國晉國公贈太傅韓公行狀

饒州刺史趙郡李府君墓誌銘

附子非熊詩目錄

送僧歸洞庭

贈覺真人

寄太白無能禪師

經河中

送張主簿

姚巖寺路懷友

送杭州姚員外

送朴處士歸新羅

送馬戴入華山

送喻鳧春歸江南

送友人及第歸蘇州

送皇甫司錄赴黔南幕

舒州酬別上卿

早鴈

夏日會修行段將軍宅

經杭州

秋日陝州道中作

瓜州送朱萬言

臣等謹按華陽集三卷唐顧況撰況字通翁

海鹽人至德二年進士德宗時以秘書郎遷
著作郎貶饒州司戶參軍晚年退居茅山自
號華陽真逸集有皇甫湜序稱為三十卷經
籍考作二十卷陳振孫書錄解題惟載其詩
集云本十五卷今止五卷今皆不傳此本乃
明萬厯中況裔孫名端者裒其詩文成三卷
末附況子非熊詩十餘首文苑英華唐文粹
中尚有況詩四首非熊詩一首皆未收入未

為賅備也非熊詩有父風登長慶第大中間
為盱眙簿亦棄官隱茅山酉陽雜俎記非熊
再世為況子事甚奇而不足信本事詩又載
況紅葉題詩事尤不經其所題詩亦猥鄙不
足傳殆好事者為之也乾隆四十一年十月
恭校上

總纂官臣紀昀臣陸錫熊臣孫士毅

總校官臣陸費墀

欽定四庫全書

華陽
目錄

十五

華陽集原序

吳中山泉氣狀英淑怪麗太湖異石洞庭朱實華亭清
唳與虎丘天竺諸佛寺鈎綿秀絕君出其中間翕輕清
以為性結冷汰以為質煦鮮容以為詞偏於逸歌長句
駿發踔厲往往若穿天心出月脇意外驚人語非尋常
所能及最為快也李白杜甫已死非君將誰與哉君字
逋翁諱況以文入仕其為人類其詞章嘗從韓晉公於
江南為判官驟成其磊落績入佐著作不能慕顧為眾

排為江南郡丞累歲脫縻無復北意起屋於茅山意飄然將續古三仙以壽卒湜以童子見君揚州孝感寺君被黃衫白絹搭頭眸子瞭然炯炯清立望之真白圭振鷺也既接歡然以我為揚雄孟軻顧恨不及見三十年於茲矣知音之厚曷嘗忘諸去年從丞相涼公襄陽有曰顧非熊生者在門訊之即君之子也出君之詩集三十卷泣請余發之涼公適移蒞宣武軍余裝歸洛陽諾而未副今又稔矣生來速文乃題其集之首為顧況撰

尚書工部郎分司東都留守判官睦州皇甫湜持正序

欽定四庫全書

身附其
原序

華陽集傳

顧況字逋翁蘇州海鹽人至德二載進士性詼諧志尚
疎逸與柳渾李泌為方外友德宗時渾輔政以秘書郎
召況以詩答之曰四海如今已太平相公何事喚狂生
此身還是籠中鳥東向滄溟叫數聲及泌相自謂當得
達官久之稍遷著作郎白居易初舉未振以詩謁況況
謔曰居易長安百物貴居不大易及讀至原上草曰野
火燒不盡春風吹又生歎曰有句如此居不大難老夫

前言戲之耳因為延譽聲名大振坐詩語調謔貶饒州
司戶叅軍有和韋蘇州郡齋雨中燕集詩以寓其悲感
況文詞之外兼攻小筆嘗求知新亭監監在鹽官海瀕
人或詰之況曰余要貌海中山耳仍辟畫者王默為副任
半年解後落筆有奇趣況家縣南五十里之橫山宅邊
有禪寂寺故有家在雙峯蘭若邊之句後結廬茅山號
華陽真逸年九十卒人謂尸解去有集皇甫湜為序湜
嘗曰自吾為顧況集序未嘗許人也其為名流歎重如

此叙稱有集二十卷然通考集目不載今裒拾散亡都
為三卷海鹽姚士麟譔

欽定四庫全書

華陽集卷上

唐 顧況 撰

賦

高皇受命造唐賦

并序

隋文帝滅陳盪定海內錫昏多罪墜失先業身滅國替
幼恭以神人非聖莫可乃命太保蕭造奉皇帝璽綬歸
我高祖高祖固讓謠歌獄訟已歸唐矣而薛舉王充實
建德等陳勝倡禍為漢作階失鹿臺之積非無財也問

左之戎非無卒也湯以七十里文王以百里而臣諸侯
非有土也隋地徧天下二帝之業一朝埽盡可不謂大
悲乎吳公子札古之達天命者其歌唐思深哉其有陶
唐氏之遺風乎氣蒸芒碭龍躍太原天命也昔司馬相
如賦子虛諸侯之事非天子之事漢武聞之猶曰朕獨
不得與此人同時班固張衡左太冲所賦兩京三都各
務誇大而王者受命則闕而不書蓋賦者古詩之流古
者採詩言之無罪今王澤不竭斯文未喪翰墨間作其

誰曰不然先王建國始以文經上行下效終以武定疆
本弱枝四方翕然無凶人矣故明德慎罰文王所以造
周也應天順人武王所以克商也書曰帝堯聰明文思
帝舜濬哲文明斷自唐虞洎乎周漢帝王美稱以文為
首我唐文德宜在三代之上微臣賦頌耻居數子之下
初論隋氏顛覆次論皇家開統末論告厥成功簡于上
帝鋪乎下土播乎無窮固非常才淺慮之所能及意者
實以祖宗光靈引耀鼓動之所致也其辭曰

在桓靈之道瞋分本小而末大下陵而上替君臣相失
南北歷帝天醜隋而命唐纂周漢之鴻裔大哉文王王
季其父武王其子父作子述叶天命以應期煬為不道
庶官攜貳魚爛土崩荒沉所致雖曰匹夫之勇有盜中
原之意凶貫既盈果不保於神器江都之禍酷甚望夷
之事亡國之君雖綿古而必類王者父天母地非所以
苟其身而貪厥位豈有男女疾痛而父母不為之歔歔
乎此真主所以乘時而建義也曾不一戰而得行其志

湯武應天也其實誓師高祖受禪也其實揖讓猶感恩
以慟哭乃立代而尊煬仗順而升蓋前經之所曠承土
德以播業兮與炎靈而更王維李其根降居真源洎武
昭之隴胄揚太祖之周勲典則明融是將貽乎子孫高
皇生而豁達大度狗齊弱而能言神光佳氣兮爛以氛
氲中凝白雀兮戴紫雲隱隱瞳瞳兮始乎太原君子得
時有如追奔岷峨導江兮河出崑崙雷砰電掣浩浩渾
渾厥波雖雄為海所吞乾健而坤順兮利配乾而法坤

有何姦豪恃險偷存乃建皇極鍾乎歷數革舊鼎新兮
式間封墓走百神以咸秩兮包五嶽以作固過蒲津而
川后增流兮次霍邑而山靈告路彼上慘下黷兮我寬刑
以薄賦陋茅屋乎土階遵朱干與大輅乃有嚴更之署
環衛勾陳文昌武庫玉冊韜府兮內八景之真文金盤
粲霞兮承九天之清露元聖有作恢法度也厥祖草昧
諸夏宗臣蠻夷酋長從德如歸若王固讓而天下可違
乎有社稷焉不可闕祀有蒸人焉不可無主是以木曰

威仰火曰燁怒辰戌丑未王我唐土天實若曰四海橫
波虔劉扎瘡若王盤桓奈天下何義寧二年五月甲子
高祖即位木宮曰甲水宮曰子支干相生成字為李雖
子卯不舉而以是為戒此臣子所以服泰階也神祇叶
從龜筮攸同乃更正朔以刀文為開通告于上下予懋
乃德嘉乃丕績若將隕于厥躬草艾渠魁兮罔駕英雄
拔萬姓于湯火兮散三光於昊穹此皇王所以職教化
也非天不應非聖不作造我鉅唐在夏之興弼成九服

經啟九道荒厥迹之茫茫在周之興西至流沙東至樂浪重九譯乎越裳在漢之盛大夏身毒月支夜郎辰韓之國畫革傍行未若我唐歌其聲舞其容十有二部鏡立乎中央唐既有土德樂亦有臣妾易曰殷薦上帝又曰行地無疆提封所經聲教所被窮天下之琛怪截海外之梯航逾蟠桃而跨弱水兮蓋四十萬里鳥飛驥驟兮鱗萃乎舲舳不以三代為境土七雄為富彊乎何則漢高提劍學校興於文景周武載戈頌聲作於成康卜

代三十延祚四百亦謂之享國久長與夫青牛紺幪白
馬朱鬃報千祀於元君兮呼萬年於太行林邑貢能言
之鳥大宛奉汗血之馬孰與四白鹿四白狼乎擒建德
於武庫兮格魏公於敖倉耕有三十年之蓄以備凶荒
戰有百萬衆之師以讐戎羌胡驕則馬銜塞草寇虐則
龍決天潢又孰與周漢之廣建康莊在歲九天之下九
地之上兮合二九為一方凝碧樹於洞房送白雲於帝
鄉舞破陳於清廟兮準文始與西廂迎氣於東郊兮養

老於上庠禘祫之禮秬鬯圭瓚兮辟雍明堂襲蛟鱸之
馥馥疊鼉鼓之鏜鏜羽林孤兒青衿胄子森琳瑯以鏘
鏘河山巨防百二盤岡渭水貫都兮來天漢之湯湯浞
龍宮而捎鬼國延苑囿而峻墉隍驅馳騶駼犀象乘黃
附翼之馬骨騰肉飛滅沒陸梁驚出女床鸛鷄白鵬孔
翠翺翔縮沙磧與江湘休徵四塞兮花萼連芳大容揮
絃兮子晉吹簫飛廉馳道兮河鼓服箱雍門韓娥流徵
叩商徹歌鐘於未央校羽獵於長楊升平既久兵設不

防倭自燕垂陷乎洛陽雲雷邁難金火耀芒上帝之哀
下人兮生魂魄而起膏肓肅宗龍飛日出鳳翔兮四誅
犬羊代宗赫怒兮草被嚴霜復九廟之郊裡三辰忽乎
曄煌扶已橈之厚棟紉既絕之頰綱然一胡作亂四海
犇亡父習乎勇母抱其子乘城者戰電埽八荒天下大
定朝廷無事帝端拱于穆清呀溟渤以為池兮拓宇宙
以為城務子來之經營乃有棟宇之盛砥砢礪砢刻楠
雕楹甲乙於方中兮勢天矯兮上征東西兩京岳立雲

峙宮室相望八百餘里雖千數萬名猶未盡也翼翼我
戎重關四塞抵昆明而瞰太液象蓬壺之廣大踐泰華
而節終南抱周秦之襟帶於是偃師偶人郢匠朽壤之
輦工發藻繪情生眄睐式瞻魄駭爰處體忼乃有與服
之飾鏤輟錯衡霓旌羽蓋紋窓繡戶宵玲瓏以相對明
月夜光煥合影乎其內青琴素女間木難之首飾響結
綠之腰珮嗟神人之叶和感雨露之霽霈職貢隘八舟
車溢載馮夷陽侯既降於英靈木魅山鬼不勞乎祈賽

于時太府太倉粟腐繒敗荔枝橘柚魚鹽惟錯之蒨隘
幽明黜陟輕重約法之殿最重二百年天下九百餘萬
戶六千三百萬口徭輕斂寡國富家肥砢礧巖炭琅琅
磻磻兮沸渭駭沓訇訇噦噦兮亘地罄天來朝會兮天
子於是乎班瑞等威畀其君長降為牧守宸衿恢張以
天地之無外一萬二千年為一紀三萬六千年為一代
古者登泰山七十二君兩漢踵武亭亭云云八百餘年
寂寥無聞我唐傳祚已來革隋一封岱二克復三除兇

四五將發三門備南正司天北正司地勾測影於北至
建相風於南寺太微太乙金版玉笥逮夫淹中闕里之
類蓋三十萬卷傾古今之文字振古以來未之有也其
事始於武德成於貞觀興於開元天寶之間唐虞夏殷
之世不足多也然則天子四海為家六合為都方明參
乘昌寓為御三載考績五載一巡狩觀萬國之有無禹
會會稽舜遊蒼梧曰徯予后后來其蘇天子於是命有
司興農圃廢土木放女謁斥讒夫臣拜手稽首陳厥謨

康哉良哉耻其君不及唐虞

茶賦

稽夫天地之不平兮蘭何為兮早秀菊何為兮遲榮皇
天既孕此靈物兮厚地復糅之而萌惜下國之偏多嗟
上林之不至如羅玳筵展瑤席凝藻思開靈液賜名臣
留上客谷鶯囀宮女嘯汎濃華漱芳津出恒品先衆珍
君門九重聖壽萬春此茶上達於天子也滋飯蔬之精
素攻肉食之羶膩發當暑之清吟滌通宵之昏寐杏樹

桃花之深洞竹林草堂之古寺乘槎海上來飛錫雲中
至此茶下被於幽人也雅曰不知我者謂我何求可憐
翠澗陰中有碧泉流舒鐵如金之鼎越泥似玉之甌輕烟
細沫靄然浮爽氣淡烟風雨秋夢裡還錢懷中贈橘雖
神秘而焉求搜神記漢孝武時宣城有入武邑山採茗逢一毛人長丈餘引客入山採茗贈懷中
橘而去異苑曰陳重母孀居每以茶為薦宅中古塚重
兄弟以塚何靈將發掘母固止之獲免夜夢人云居此
三百年今者謬蒙恩
澤及晨獲錢二百萬

古詩

上古之什補亡訓傳十三章

上古慇農也

遐哉上古生棄與柱勾龍是主乃有甫田惟彼甫田有
萬斯年開利之源無乃塞源一廛亦官百廛亦官嗇夫
孔艱浸兮暵兮申有螽兮惟馨祀是患豈止餒與寒嗇
夫咨咨稊盛苗衰耕之耰之發襖鋤犁手胼足胝水之
蛭螾吮喋我肌我姑自思胡不奮飛東人利百西人利
百有匪我心胡為不易河水活活萬人逐末俾爾之愉
悅兮

上古一章

左車憑險也震為雷兄長之左東方之師也憑險不已君子憂心而作是詩

左車有慶萬人猶病曷何去之于黨孔盛敏爾之生胡為波迸

左車有赫萬人毒螫曷可去之于黨孔碩敏爾之生胡為草戚

左車二章

築城刺臨戎也寺人臨戎以墓碑為城壁

築城登登于以作固咨爾寺兮發郊外冢墓死而無知
猶或不可若其有知惟上帝是愬

築城奕奕于以固敵咨爾寺兮發郊外冢墓死而無知
猶或不可若其有知惟上帝是謫

築城二章

持斧啓戎士也戎士伐松柏為蒸薪孝子徘徊
而作是詩

持斧持斧無翦我松栢兮栢下之土藏吾親之體魄兮

持斧一章

十月之郊造公室也君子居公室當思布德行
化焉

十月之郊羣木肇生陽潛地中舒達勾萌曠其蔚兮不
可以遊息乃爚蒺藜乃夷荆棘乃繇彼曲直匠氏度思
登斧以時澤梁蓁蓁無或夭枝有巨根蒂生混茫際呼
吸羣籟萬人揮斤坎坎有厲陸遷水濟萬力殫弊審方

面勢姑博其製作為公室公室既成禦燥濕風日棟之
斯厚棖之斯密如翼于飛如鱗櫛比繚以周墉城以崇
階俯而望之矗與雲齊礪砭砭硃藻并旋題丹素之煥
兮椒桂之馥兮高閣高閣珠綴結絡金鋪爛若不集于鳥
雀繪事告畢賓筵秩秩乃命旨酒乃鼓琴瑟琴瑟在堂莫
不靜謐周環掩闕仰不漏日冬日嚴凝言納其陽和風
載昇夏日鬱蒸言用于陰涼風颭興有匪君子自賢不
已乃夢乘舟乃夢乘車夢人占之更爽其居炎炎則移

皎皎則虧木實之繁兮明年息枝爰處若思胡寧不爾思

十月之郊一章

燕于巢審日辰也燕不以甲乙銜泥

燕燕于巢綴葺維戊甲兮乙兮不宜有謬飛龍在天雲
掩于斗曷日于雨乃曰庚午彼日之差亦孔斯醜昔在
羲和酒淫不修我筮我龜莫我告繇膚廼征之藝倫九
疇君子授律是禡是類三五不備罔克攸遂惠此蒸

人母廢爾事爾莫我從維來者是冀

燕于巢一章

蘇方諷商胡舶舟運蘇方歲發扶南林邑至齊

國立盡

蘇方之赤在胡之舶其利乃博我土曠兮我居闐兮我衣不白兮朱紫爛兮傳瑞曄兮相唐虞之維百兮

蘇方一章

陵霜之華傷不實也

陵霜之華我心憂嗟陰之勝矣而陽不加塊軋大鈞乃帝
乃神乃舒乃屯烈烈嚴秋熙熙陽春職生有倫今華發
非其辰辰屬東方之仁遐想三五黃帝登雲堯年百餘
二儀分位六氣不渝二景如璧五星如珠陵霜之華兮
何不妄敷

陵霜之華一章

囷哀閩也

囷音蹇閩俗呼子
為囷呼父為郎罷

囷生閩方閩吏得之乃絕其陽為臧為獲致金滿屋為

髡為鉗如視草木天道無知我罹其毒神道無知彼受
其福郎罷別囡吾悔生汝及汝既生人勸不舉不從人
言果獲是苦囡別郎罷心摧血下隔地絕天及至黃泉
不得在郎罷前

囡一章

我行自東不遑居也

我行自東山海其空旅棘有叢我行自西壘與雲齊雨
雪淒淒我行自南烈火滿林日中無禽霧雨淫淫我行

自北燭龍寡色何枉不直我憂京京何道不行兮

我行自東一章

採蠟怨奢也荒巖之間有以續蒙其身腰藤造
險及有羣蜂肆毒哀呼不應則上捨藤而下沈
之壑

採採者蠟于泉谷兮煌煌中堂烈華燭兮新歌善舞弦
柱促兮荒巖之人自取其毒兮

採蠟一章

五言古詩

在滁苦雨歸桃花崦傷親友畧盡

廢棄忝殘生後來亦先天詩人感風雨長夜何時曉去
國宦情無近鄉歸夢少庇身絕中授甘靜忘外擾麗景
變重陰洞山空木表靈潮若可通寄謝西飛鳥

苦雨

朝與佳人期碧樹生紅萼暮與佳人期飛雨洒清閣佳
人宵何許中夜心寂寞試憶花正開復驚葉初落行騎

飛泉鹿卧聽雙海鶴嘉願有所從安得處其薄

戈陽溪中望仙人城

何草乏靈姿無山不孤絕我行雖云蹇偶勝聊換節上
界浮中流光響洞明滅曉禽曝霜羽寒魚依石髮自有
無還心隔波望松雪

遊子吟

故樞思疲馬故窠思迷禽浮雲蔽我鄉躑躅遊子吟遊
子悲久滯浮雲鬱東岑客堂無絲桐落葉如秋霖
黯哉

遠遊子所以悲滯淫一為浮雲詞憤塞誰能禁馳歸百
年內唯願展所欽胡為不歸歟坐使年病侵未老霜遶
鬢非狂火燒心太行何難哉北斗不可斟夜靜星河出
耿耿辰與參佳人覓青天尺素重於金沈寥羣動異眇
默諸境森苔衣上閑階蟋蟀催寒碁立身計幾悞道險
無容針三年不還家萬里遺錦衾夢魂無重阻離憂罔
古今胡為不歸歟辜負匣中琴腰下是何物牽纏曠登
尋朝與名山期夕宿楚水陰楚水殊演漾名山窅嵒嶽

客從洞庭來，婉孌瀟湘深。橘柚在南國，鴻鴈遺其音。下有碧草洲，上有青橘林。引燭窺洞穴，凌波睥天琛。蒲荷影參差，鳬鶴雛淋演。浩歌惜芳杜，散髮輕華簪。胡為不歸歟？淚下沾衣襟。鳶飛戾霄漢，螻蟻制鱣鱣。赫赫大聖朝，日月光臨聖主。雖啓迪吾人，分湮沉層城。登雲韶，玉府鏘球琳。鹿鳴志豐草，況復虞人箴。

歸陽蕭寺有丁行者能修無生忍擔水施僧況
歸命稽首作詩

化佛示持帚仲尼稱執鞭列生御風歸飼豕如人焉曹
溪第六祖踏碓逾三年伊人自何方長綬趨遙泉開士
行何苦雙瓶胝兩肩蕭寺百餘僧東厨正揚煙露足沙
石裂外形巾褐穿若其有此身豈得安穩眠獨出違順
境不為寒暑還大聖於其中領我心之虔萬法常空滅
無生因忍全一國一釋迦一燈分百千永願遺世知現
身彌勒前潛容徧虛空靈響不可傳智慧舍利弗神通
目捷連阿若憍陳如迦葉迦旃延左右二菩薩文殊并

普賢身披六銖衣億劫為大仙寶塔寶樓閣重簷交梵
天譬如一明珠共贊光白圓天魔波旬等降伏金剛堅
野叉羅刹鬼亦赦塵垢纏乃致金翅鳥吞龍護洪淵一
十一衆中身意皆快然入河注大海中有楞伽船佛法
付國王平等無頗偏天子事端拱大臣行其權玉堂無
蠅飛五月冰凜筵盡力答明主猶自招罪愆九族無白
身百花動嬋娟神聖惡如此物華不能妍祿山一微胡
驅馬來自燕宛彼宮闕麗如何犬羊羶苦哉千萬人流

血成丹川此輩之死後鑊湯所熬煎葉風吹其魂猛火
燒其烟獨有丁行者無憂樹枝邊市頭盲老人長者乞
一錢韜照多密用為君吟此篇

酬信州劉侍郎兄

劉兄本知命屈伸不介懷南州管靈山可惜曠土乖樵
隱同一徑竹樹薄西齋烏陵嶂合沓月配波徘徊薄宦
修禮數長景謝譚諧願為南州民輸稅事鉏犁胡為走
不止風雨驚遭迴

望初月簡于吏部

沉寥秋中夜坐見如鉤月始從西南生又欲西南沒全移河上影斲透林間缺縱待三五時終為千里別

上湖至破山贈文周蕭元植

一別二十年依依過故轍湖上非往態夢想頻虛結二子伴我行我行感徂節後人應不識前事寒泉咽一別二十年人堪幾回別

酬本部韋左司

一作奉和同郎中韋使君郡齋雨中宴集

好鳥依佳樹飛雨灑高城況與二三子

一作數
君子

列坐分

兩楹文雅此何盛

一作一
何麗

林塘含餘

一作夕

清府君

一作我公

未歸朝遊子不待晴白雲帝城

一作鄉

遠滄江楓葉鳴却

畧欲一言

一作拜手
欲無言

零淚和

一作如

酒傾寸心久

一作已

摧

折別離重

一作方

骨驚安得凌風翰肅肅四海輕

一作天京

賓

酬房杭州

郡樓何其曠亭亭廣而深故人牧餘杭留我披胃衿滿
篋閱新作璧玉誕清音流水入洞天宵豁欲凌臨闕險

延北阜薙道陟南岑朝從山寺還醒醉動笑吟荷花十
餘里月色攢湖林父老惜使君却欲速華簪

酬漳州張九使君

故人窮越徼狂生起悲愁山海萬里別草木十年秋鞭
馬廣陵橋出祖張漳州促膝墮簪珥關幌憂琳球短題
自茲簡華篇詎能酬無階承明庭高步相追遊南方榮
桂枝凌冬捨溫裘猿唵郡齋中龍靜檀藥流薜鹿莫徭
洞網魚盧亭洲心安處處安處處思遐陬

從江西至彭蠡入浙西淮南界道中寄齊相公
大賢舊丞相作鎮江山雄自鎮江山來何人得如公處
士待徐孺仙人期葛洪一身控上遊八郡趨下風比屋
除畏溺林塘曳烟虹生人罷虔劉并稅均且充大府肅
無事歡然接悲翁心清百丈泉目送孤飛鴻數年鄱陽
掾抱責栖微躬首陽及汨羅無乃褊其衷楊朱并阮籍
未免哀途窮四賢雖得仁此怨何忽忽老氏齊寵辱於
陵一窮通本師留度門平等寬親同能依二諦法了達

三輪空真鏡靡方所出離內外中無邊盡未來定慧雙
修功蹇步慚寸進飾裝隨轉蓬朝從楚水陰夕宿吳洲
東吳洲復白雲楚水飄丹楓晚霞燒迴潮千里光瞳瞳
莫開海上影桂吐淮南叢何當翼明庭草木生春融

寄上兵部韓侍郎奉呈李戶部盧刑部杜三侍
郎

道路五千里門闌三十年當時攜手人今日無半全詠
題官舍內賦韻僧房前公登畧釣橋況榜龍舸船遠寺

吐朱閣春潮浮綠烟鵷鴻翔鄧林沙鵠飛吳田諸子紛
出祖中宵久留連坐客三千人皆稱主人賢國士分如
此家臣亦依然身在薜蘿中頭刺文案邊故吏已重疊
門生從聯翩得罪為何名無階問皇天出門多岐路命
駕無由緣伏承諸侍郎顧念一述遭聖代逢三宥營魂
空九遷

謝王郎中見贈琴鶴

此琴等焦尾此鶴方胎生赴節何徘徊理感物自并獨

立江海上一彈天地清朱絃動瑤華白羽飄玉京因想
羨門輩眇然四體輕子喬翔鄧林王母遊層城忽如啓
靈署鸞鳳相和鳴何由玉女床去食琅玕英

贈別崔十三長官

真玉燒不熱寶劒拗不折欲別崔俠心崔俠心如鐵復
如金剛鎖無有功不徹仍於直道中行事不詆訐崔俠
兩兄弟垂範繼芳烈相識三十年致書字不滅我來宣
城郡飲水仰清潔藹藹北阜松栽栽南山雪顧生歸山

去知作幾年別

嚴公釣臺作

靈芝產遐方威鳳駕重霄嚴公何耿潔託志肩夷巢漢
后雖則貴子陵不知高糠粃當世道長揖夔龍朝掃門
彼何人升降不同朝捨舟遂長往山谷多清飈

長安竇明府後亭

君為長安令我美長安政五日一朝天南山對明鏡鳥
飛青苔院水木相輝映客至南雲鄉絲桐展歌詠吏人

何蕭蕭終歲無喧競欲識明府賢邑中多百姓

和翰林吳舍人兄弟西齋

君家誠易知易知復難同新裁尺一詔早入明光宮西
齋何其遠上與星漢通永懷洞庭石春色相玲瓏又懷
巴峽泉夜落君絲桐信是怡神所迢迢茂華嵩鳥飛晴
雲滅疊嶂盤虛空君家誠易知易知意難窮

華山西岡遊贈隱元叟

羣峯鬱初霽潑黛若鬟沐天風鼓唅呀搖撼千灌木

葉微墮黃石泉淨停綠危磴蘿薜牽迥步入幽谷我心
寄青霞世事慚蒼鹿遂令巢許輩于焉謝塵俗想是悠
悠雲可契去留躅

初秋蓮塘歸

秋光淨無跡蓮消錦雲紅只有溪上山還識揚舲翁如
何白蘋花幽渚笑涼風

擬古三首

龍劍昔藏影送雄留其雌人生阻懽會神物亦別離碧

樹感秋落佳人無還期夜琴為君咽浮雲為君滋愛而傷不見星漢徒參差

其二

幽居盼天造胡息運行機春葩妍既榮秋葉瘁以飛滔滔川之逝日沒月光輝所貴法乾健于道悟入微任彼聲勢徒得志方誇毗

其三

浮生果何慕老去羨介推陶令何足錄彭澤歸已遲空

負漉酒巾乞食形諸詩吾惟抱貞素悠悠白雲期

棄婦詞

古人雖棄婦棄婦有歸處今日妾辭君辭君欲何去本
家零落盡慟哭來時路憶昔未嫁君聞君甚周旋及與
同結髮值君適幽燕孤魂託飛鳥兩眼如流泉流泉咽
不燥萬里關山道及至見君歸君歸妾已老物情棄衰
歇新寵方妍好拭淚出故房傷心劇秋草妾已憔悴捐
羞將舊物還餘生欲有寄誰肯相留連空床對虛牖不

覺塵埃厚寒水落芙蓉秋風墮楊柳記得初嫁君小姑
始扶床今日君棄妾小姑如妾長回頭語小姑莫嫁如
兄夫

從軍行二首

弭節結徒侶速征赴龍城單于近突圍烽燧屢夜驚長
弓挽滿月劒華霜雪明遠道百草殞峭覺寒風生風寒
欲砭肌爭奈裘襖輕回首家不見候鴈空中鳴笳奏還
以哀肅肅趣嚴程寄語塞外胡擁騎休橫行

其二

少年膽氣麓好勇萬人敵仗劍出門去三邊正艱厄怒
目時一呼萬騎皆辟易殺人蓬麻輕走馬汗血滴呼韓
何足清天山坐寧謐不有封侯相徒負幽并客

塞上曲

黠虜初南下塵飛塞北境漢將懷不平讎擾當遠屏金
革卧不暖起舞霜月冷點軍三十千部伍嚴以整酣戰
祈成功于焉罷邊釁

哭從兄萇

洞庭違鄂渚，嫋嫋秋風時。何人不客遊，獨與帝子期。
黃鵠鍛飛翅，青雲歎沉姿。身終一騎曹，高蓋者為誰。
從駕至梁漢，金根復京師。皇恩溢九垓，不記屠沽兒。
立身有高節，滿卷多好詩。赫赫承明庭，羣公默無詞。
草木正搖落，哭兄鄱水湄。共居雲陽里，輶軻多別離。
人生倏忽間，精爽無不之。舊國數千里，家人由未知。
人生倏忽間，安用才士為。

傷子

老夫哭

一作喪

愛子日暮千行


一作哭成

血聲逐斷猿悲跡隨

飛鳥滅老夫已七十不作多時別

日晚歌

日窅窅兮下山望佳人兮不還花落兮屋上草生兮階
間日日兮春風芳菲兮欲歇老不可兮更少君胡為兮
輕別



華陽集卷上